

馬氏文獻通考



文獻通考卷十二

鄧陽

馬

端

臨

貴

興

著

職役考一

歷代鄉黨版籍職役

昔黃帝始經土設井以塞爭端立步制畝以防不足使八家為井并開四道而分八宅鑿井於中一則不洩地氣二則無費一家三則同風俗四則齊巧拙五則通財貨六則存亡更守七則出入相同八則嫁娶相媒九則無有相貸十則疾病相救是以情性可得而親生產可得而均均則欺凌之路塞親則鬭訟之心弭既牧之於邑故井一為鄰鄰三為朋朋三為里里五為邑邑十為都都十為師師七為州州始分於井則地著計之於州則數詳迄乎夏殷不易其制

周制大司徒令五家為比使之相保五比為閭使之相受四閭為族使之相葬五族為黨使之相救五黨為州使

之相調五州為鄉使之相賓

鄭元曰此所以勸民者也使之者皆謂立其長而教令使之保猶任也救救凶災也賓賓客其賢者也受者宅舍有故相受寄託也調者謂禮物不備相給足也閭二十

五家族百家黨五百家州二千五百家鄉萬二千五百家此總謂郊內者也

及三年則大比大比則受邦國之比要

大比謂使天下更簡閱人數及其財物也受邦國之比要則亦受鄉

送矣鄭司農云五家為比故以此為名今時八月按比是也要謂其簿

比長每比下士一人

掌五家

各掌其比之治五家相受相和親有孀寡則相及徙於國中則從而授之

徙謂不便而付所處之吏明無罪惡徙於他則為旌節而行之有節乃達若無授無節則唯圖土納之

閭胥每閭中士一人

掌二十家

各掌其閭之徵令歲時數其閭之眾寡辨其施舍凡春秋之祭祀役政喪紀之數聚

衆庶既比而讀法書其敬敏任恤者凡事掌其比犢撻罰之事

失禮者之罰也

族師每族上士一人掌一百家各掌其族之戒令政事月吉屬民讀邦法書其孝悌睦姻有學者春秋祭酺亦如之登

其族之夫家衆寡辨其貴賤老幼廢疾可任者及其六畜車輦比伍閭族各爲聯使之相保相受賞罰相及以受

邦職以役國事相葬埋若師田行役則合其卒伍簡其兵器以鼓鐸旗物帥而至掌其治令戒禁刑罰歲終則會

黨正每黨下大夫一人掌五百家各掌其黨之政令教治四孟月屬民讀法春秋祭樂亦如之國索鬼神而祭祀

祭諸則

以禮屬民而飲酒於序以正齒位凡黨之祭祀喪紀昏冠飲酒教其禮事掌其戒禁師田行役則以法治其正事

正歲屬民讀法書其德行道藝歲終則會

州長每州中大夫一人掌二千五百家各掌其州之教治政令月吉屬民讀法考其德行道藝糾其過惡而勸戒之歲時

祭祀州社則屬民讀法春秋以禮會民而射於州序州之大祭大喪皆涖其事師田行役則帥而致之掌其戒令

賞罰爲師因歲終則會正歲讀法三年大比則大考州里以贊鄉大夫廢興

遂人掌邦之野郊外曰野此野謂甸稍縣都以土地之圖經田野造縣鄙形體之法五家爲鄰五鄰爲里四里爲鄣反作管五鄣

爲鄙五鄙爲縣五縣爲遂皆有地域溝樹之使各掌其政令刑禁以歲時稽其人民而授之田野簡其兵器教之

稼穡經形體皆謂制分界也鄰里鄣鄙縣遂猶郊內比閭族黨州鄉也鄣司農云田野之居其比伍里有序而鄉

有序序以明教庠則行禮而視化焉夫均其厚薄則生產平統之於都則其數舉家於鄉遂則其戶可詳五人爲

知其地自昭穆之後王室中衰井田廢壞不足以紀人之衆寡宣王是以料人於大原由茲道失之

鄰長每鄰一人掌五家掌相糾相受凡邑中之政相贊徙於他邑則從而授之

里宰每里下士一人

掌二十五家

掌比其邑之衆寡與其六畜兵器治其政令以歲時合耦於鋤以治稼穡繼其耕耨

行其秩序以待有司之政令而徵斂其財賦

鄮長每鄮中士一人

掌一百家

各掌其鄮之政令以時校登其夫家比其衆寡治其喪紀祭祀之事作民則旗鼓兵革

帥而至歲時簡器

稼穡器

繼其耕耨稽其女工

鄮師每鄮上士一人

掌五百家

各掌其鄮之政令祭祀作民

謂起役也

則掌其戒令以時數其衆寡而察其媿惡而誅賞歲

終則會

縣正每縣下大夫一人

掌二千五百家

各掌其縣之政令徵比以頒田里以分職事掌其治訟繼其稼穡事而賞罰之若將

用野民師田行役移執事則帥而至治其政令

移執事謂先移用其民也

役則稽功會事而誅賞

章氏曰三代役法莫詳於

周周禮五兩軍師之法此兵役也師田追胥之法此徒役也府史胥徒之有其人此胥役也比閭族黨之相保此

鄉役也有司徒焉則因地之善惡而均役有族師焉則校民之衆寡以起役有鄉大夫焉則辨年之老少以從役

有均人焉則論歲之豐凶以行復役之法

齊威公用管仲仲曰夫善牧者非以城郭也輔之以什司之以伍伍無非其里什無非其家故奔亡者無所匿遷

徙者無所容不求而得不召而來故人無流亡之意吏無備追之憂故主政可行於人人人心可繫於主是以制國

郊內則以五家爲軌軌十爲里里四爲連連十爲鄉鄉五爲帥國內十五鄉自家至帥郊外則三十家爲邑邑十

爲卒卒十爲鄉鄉三爲縣縣十爲屬屬有五自家至屬各有官長以司其事以寓軍政焉而齊遂霸 徐偉長中

論曰夫治平在庶功興庶功興在事役均事役均在民數周民數周爲國之本也先王周知其萬民衆寡之數乃

分九職焉九職既分則劬勞者可見勤惰者可聞也然而事役不均者未之有也事役既均故上盡其心而人竭其力然而庶功不興者未之有也庶功既興故國家殷富大小不匱百姓休和下無怨疾焉然而治不平者未之有也故泉有源治有本道者審本而已矣故周禮孟冬司寇獻民數於王王拜受之登於天府內史司會冢宰貳之其重之也如是今之爲政者未之知恤民也譬猶無田而欲樹藝雖有農夫安能措其強力乎是以先王制六鄉六遂之法所以維持其民而爲之綱目也使其鄰比相保愛賞罰相延及故出入存亡臧否逆順可得而知也及亂君之爲政也戶口漏於國版夫家脫於聯伍避役逋逃者有之於是姦心競生而僞端並作小則濫竊大則攻劫嚴刑峻令不能救也人數者庶事之所自出也莫不取正焉以分田里以令貢賦以造器用以制祿食以起田役以作軍旅國以建典家以立度五禮用修九刑用措其唯審人數乎

秦用商鞅變法令民爲什伍而相收司連坐告姦者與斬敵首同賞不告姦者與降敵同罰按秦人所行什伍之法與成周一也然周之法則欲其出入相友守望相助疾病相扶持是教其相率而爲仁厚輯睦之君子也秦之法一人有姦鄰里告之一人犯罪鄰里坐之是教其相率而爲暴戾刻核之小人也

漢高祖二年舉民年五十以上有修行能帥衆爲善置以爲三老鄉一人擇鄉王老一人爲縣三老與縣令丞尉以事相教復勿繇戍以十月賜酒肉十里一亭亭有長十亭一鄉鄉有三老有秩嗇夫游徼三老掌教化嗇夫聽訟收賦稅游徼循禁賊盜縣大率方百里其民稠則濫稀則曠鄉亭亦如之皆秦制也

漢官儀曰遊徼亭長皆習設備五兵弓弩

戟楯刀劍鉞鼓吏赤幘行膝帶劍佩刀持盾被甲設矛戟習射十里一亭亭長候五里一郵郵間相去二里半司姦盜亭長持二尺版以劾賊執繩以收執賊

水心葉氏曰縣鄉亭之制本

於商鞅雖改法要是周衰國大者難用舊制齊晉楚裂地名官以自便往往在商鞅之前矣古者百里之狹自

爲朝廷由後世觀之疑若煩民然三老嗇夫游微猶各有職掌近民而分其責任若後世蕩然無復紀秩而令長悍然獨以征取爲事則又缺之所不爲也 新城三老董公遮說漢王爲義帝發喪討項羽

文帝十二年詔以戶口率置三老常員遣謁者勞賜三老帛人五匹

武帝元狩元年遣謁者賜縣三老帛人五匹鄉三老人二匹

元狩六年遣謁者循行天下謁三老孝弟以爲民師 戾太子發兵誅江充長安擾亂言太子反上怒甚壺關三老茂上書言太子亡邪心上感悟

宣帝元康元年加賜三老帛四年及甘露三年皆賜帛有差 王尊爲京兆尹坐免湖三老公乘興等上書訟尊治京兆功效日著書奏天子後以尊爲徐州刺史 王尊爲東郡太守河水甚溢尊躬率吏民投沈白馬狀以身填金隄水波稍却白馬三老奏其事制詔秩尊中二千石 黃霸守潁川吏民興於行誼賜三老爵及帛 韓延壽守馮翊有昆弟訟田延壽曰咎在馮翊稱疾病不聽事令丞嗇夫三老亦自繫待罪

元帝初元元年賜三老帛人五匹

五年賜三老帛人五匹

元光二年賜三老帛

成帝建始元年賜三老錢帛

綏和元年賜三老帛

平帝元始三年賜三老帛

西漢凡縣道

有蠻夷曰道

國列侯所食曰國

邑皇太后皇后公主所食曰邑

千五百八十七鄉六千六百二十二亭二萬九千六百三十

五

東漢鄉置三老掌教化凡有孝子順孫正女義婦遜財救患及學士爲民法式者皆扁表其門閭以興善行鄉置有秩游徼有秩郡所置秩百石掌一鄉人其鄉小者縣置嗇夫一人皆主知民善惡爲役先後知民貧富爲賦多少平其差品游徼掌循禁司姦盜又有鄉佐屬鄉王民收賦稅亭有長以禁盜賊里有里魁民有什伍善惡以告本注曰里魁掌一里百家什主十家伍主五家以相檢察有善事惡事以告監官

漢官儀曰鄉戶五千則有秩

明帝位賜爵三老孝弟力田人三級注云三老孝弟力田皆鄉官之名三老高帝置孝弟力田高后置所以勸導鄉里助成風化今考西漢高后紀元年初置孝弟力田二千石者一人師古曰特置孝弟力田官而尊其秩欲以勸厲天下令各敦行務本然則三老鄉各一人孝弟力田詭祿秩如許尊未必各鄉皆設有其人則置之耳孝文武宣成哀紀各有賜孝弟力田金帛爵級事

元和二年帝耕於定陶詔曰三老尊年也孝弟淑行也力田勤勞也國家甚休之其賜帛人一匹勉率農功

永平三年賜三老孝弟力田爵人三級

十二年賜三老孝弟力田爵人三級

十七年賜三老孝弟力田爵人三級

章帝建初三年賜三老孝弟力田爵人三級

四年立皇太子賜爵同

和帝永光八年賜爵同

十二年賜爵同

元興元年立皇太子賜爵同

安帝永初二年帝加元服賜爵二級

元初元年賜爵同

延光元年賜爵人一級

順帝永建元年賜爵人三級

四年賜爵二級

陽嘉元年賜爵三級

桓帝建和元年賜爵同

獻帝建安元年賜爵人二級

晉制每縣戶五百以上皆置鄉三千以上置二鄉五千以上置三鄉萬以上置四鄉鄉置嗇夫一人鄉戶石每千

以下置治書吏一人千以上置史佐各一人正一人五千五百以上置史一人佐二人縣率百戶置里吏一人其

土廣人稀聽隨宜置里吏限不得減五十戶千以上置校官掾一人縣皆置方略吏四人洛陽縣置六部尉江

左以後建康亦置六部尉餘大縣置二人次縣小縣各一人鄴長安置吏如三千戶以上之制

東晉哀帝崇和元年三月庚戌天下所在土斷 孝武時范甯陳時政曰昔中原喪亂流寓江左庶有旋反之期

故許其狹注本郡自爾漸久人安其業邱壠墳柏皆以成行無本邦之名而有安土之實今宜正其封疆土斷人戶明考課之科修閭伍之法難者必曰人各有桑土之懷下役之虐斯成并兼之所執而非通理之篤論也古者失地之君猶臣所寓之主列國之臣亦有違適之禮隨會仕秦致稱春秋樂毅追燕見褒良史且今普天之人原其氏出皆隨代移遷何至於今而獨不可帝善之安帝義熙九年宋公劉裕緣人居土上表曰臣聞先王制禮九土攸序分境畫野各安其居故井田之制三代以崇秦革其政漢遂不改富強兼并於是爲弊在漢西京大遷田景之族以實關中卽以三輔爲鄉閭不復係之於齊楚九服不擾所託成舊自永嘉播越爰託淮海朝運匡復之算人懷思本之心經略之圖日不暇給是以寧人綏理猶有未遑及至大司馬桓溫以人無定本傷理爲深庚戌土斷以一其業於時財阜國豐實由於此自茲迄今彌歷年載畫一之制漸用頽弛雜居流寓閭伍不修王化所以未純民瘼所以猶在自非改調無以濟理夫人情滯常難與慮始謂父母之邦以爲桑梓者誠以生焉敬愛所託請依庚戌土斷之科庶存其本稍與事著然後率之以仁義鼓之以威聲超大江而跨黃河撫九州而復舊土則戀本之志乃速申於當年在始暫勤要終必易於是依界土斷唯青兗徐三州人居晉陵者不在斷限諸流寓郡縣多被併省

宋孝武大明中王元謨請土斷雍州諸僞郡縣

今襄陽漢東等郡也

齊高祖建元二年詔朝臣曰黃籍人之大紀國之理端自頃氓僞已久乃至竊注爵位盜易年月或戶存而文書白絕或人在而反記死叛停私而云隸役身強而稱六疾皆政之巨蠹教之深疵比年雖却改籍書終無得實若約之以刑則人僞已遠若緩之以德又未易可懲諸賢並深明理體各獻嘉謀以何科算能革斯弊也虞玩之

上表曰宋元嘉二十七年八條取人孝建元年書籍衆巧之所始也元嘉中故光祿大夫傅崇年出七十猶手自書籍躬加隱校古之共理天下唯良二千石今欲求理正其在勤明令長凡受籍縣不加檢勘但封送州州檢得知方却下歸縣吏貪其賂人肆其姦姦彌深而却彌多賂逾厚而答逾緩自泰始三年至元徽四年揚州等九郡黃籍共却七萬一千餘戶於今十一年矣而所正者猶未四萬神州奧區尙或如此江湘諸郡尤不可言愚謂宜以元嘉二十七年籍爲正人情法既久今建元二年書籍宜更立明科一聽首悔迷而不返依制必戮使官長審自檢校然後上州永以爲正若有虛昧州縣同咎今戶口多少不減元嘉而版籍頓闕弊亦有以自孝建以來入勦者衆其中操干戈衛社稷者三分殆無一焉尋蘇峻平後庾亮就溫嶠求勦簿而嶠不與以爲陶侃所上多非實錄物之懷私無代不有又有改注籍狀詐入仕流昔爲人役者今反役人又生不長髮便謂道人或抱子并居竟不編戶遷徙去來公違土斷屬役無漏流亡不歸法令必行自然競反爲理不患無制患在不行不患不行患在不久帝省表納之乃別置校籍官置令史限人一日得數巧以防懈怠至武帝永明八年謫巧者戍緣淮各十年百姓怨咨帝乃詔曰旣往之愆不足追咎自宋昇明以前皆聽復注其有謫邊疆皆許還本自此後有犯嚴其罪

梁武帝時所司奏南徐江郢連兩年黃籍不上帝納尙書令沈約之言詔改定百家譜約上言曰晉咸和初蘇峻作亂版籍焚化此後起咸和三年以至乎宋並皆詳實朱筆隱注紙連悉縫而尙書上省庫籍唯有宋元嘉中以來者晉代舊籍並在下省左人曹謂之晉籍自東西二庫旣不係尋檢主者不復經懷狗牽鼠齧雨溼沾爛解散於地又無肩膝此籍精詳實宜保惜位高官卑皆可依接宋元嘉二十七年始以七條徵發旣立此科苟有迴

避姦僞互起歲月滋廣以至於齊於是東堂校籍置郎令史以掌之而簿籍於此大壞矣凡粗有衣食者莫不互相因依競行姦貨落除卑注更書新籍通官榮祿隨意高下以新換故不過用一萬許錢昨日卑微今日仕伍凡此姦巧並出愚下不辨年號不識官階或注義熙在寧康之前或以崇安在元興之後此時無此府此年無此國元興唯有三年而猥稱四年又詔書甲子不與長曆相應如此詭譎萬緒千端校籍諸郎亦所不覺不才令史更何可言且籍字既細難爲眼力尋求巧僞莫知所在徒費日月未有實驗假令兄弟三人分爲三籍却一籍祖父官其二初不被却同堂從祖以下固自不論諸如此例難可悉數或有應却而不却不須却而却所却既多理無悉當懷冤抱屈非止百千投辭請訴充曹掾府既難領理交與人怨於是悉聽復注普停洗却既蒙復注則莫不成官此蓋核籍不精之巨弊也臣謂宋齊二代士庶不分雜役減闕職由於此自元嘉以來籍多假僞景平以前既不係檢凡此諸籍得無巧換今雖遺落所存尙多宜有徵驗可得信實其永初景平籍宜移還上省竊以爲晉籍所餘須加寶愛若不留意則遠復散失矣不識胄允非謂衣冠凡諸此流罕知其祖假稱高曾莫非巧僞實諸文籍姦事立露徵覆矯詐爲益實弘又上省籍庫雖直郎題掌而盡日科校唯令史獨入籍既重寶不可專委羣細若入庫檢籍之時直郎直都應共監視寫籍皆於郎都目前並皆掌置私寫私換可以永絕事畢郎出仍自題名臣又以爲巧僞多並稱人士百役不及高臥私門致令公私闕乏是事不舉宜選史傳學士諳究流品者爲左人郎左人尙書專共校勘所貴卑姓雜譜以晉籍及宋永初景平籍在下省者對共讎校若譜注通籍有卑雜則條其巧謬下在所科罰帝以是留意譜籍詔御史中丞王僧孺改定百家譜由是有令史書吏之職譜局因此而置始晉太元中員外散騎侍郎賈弼好簿狀大披羣族所撰十八州百一十六郡合七百一十二卷士庶略無遺

闕其子孫代傳其業宋王弘劉湛並好其書弘日對千客不犯一人諱湛爲選曹始撰百姓譜以助銓序傷於寡略齊王儉復加得繁省之吏僧孺爲八十卷東南諸族別爲一部不在百家之數按魏晉以來最重世族公家以此定選舉私門以此訂婚姻寒門之視華族如冠屨之不侔則夫徭役賤事人之所憚固宜其改竄冒僞求自附流品以爲避免之計也然徭役當視物力雖世族在必免之例而官之占田有廣狹濁之蔭後有久近若於此立法以限之不勞而定矣不此之務而方欲改定譜籍雖曰選請究流品之人爲郎尙書以掌之然僞冒之久者滋多非敢於任怨者誰肯澄汰如楊佺期并韶至以恥憤構逆亂則澄汰亦豈易言哉

陳文帝天嘉初詔曰自頃編戶播遷良可哀傷其亡鄉失土逐食流移者今年內隨其適樂來歲不問僞舊悉令著籍同土斷之例按周官之法貴者賢者及新眡之遷徙者皆復其征役後世因之故六朝議征役之法必以土斷僞寓釐正譜籍爲先然自晉至梁陳且三百年貴者之澤既斬則同於編氓僞者之居既久則同於土著難以稽考此所以僞冒滋多而議論紛紛也

後魏初不立三長唯立宗主督護所以人多隱冒五十三家方爲一戶謂之蔭附蔭附者皆無官役豪強徵斂倍於公賦孝文太和十年納給事中李冲之說遂立三長

三長謂五家一鄰長五里一黨長

李冲以爲三正理人所由來

達於是創三長之制曰宜準古五家立一鄰長五鄰立一里長五里立一黨長取鄉人強謹者鄰長復一夫里長二黨長三三長三載亡愆則陟用之一等太皇覽而稱善引見公卿議之中書令鄭義祕書令高祐等曰冲求立三長者乃欲混天下爲一法言似可用其實難行太尉元丕曰臣謂此法若行公私有益方今有事之月校比人戶新舊未分人心勞怨請過今秋至冬閑月徐乃遣使於事爲宜冲曰人可使由之不可使知之若不因課時百

姓徒知立長校戶之勤未見均徭省賦之益心必生怨宜及課調之月令知賦稅之均既識其事又得其利因人之欲爲之易行著作郎傅思益進曰人俗既異險易不同九品差調爲日已久一朝改法恐成擾亂太后曰立三長則課有常準賦有常分包蔭之戶可出僥倖之人可止何爲而不可遂立三長公私便之

北齊令人居十家爲鄰比五十家爲閭百家爲族黨一黨之內則有黨族一人副黨一人閭正二人鄰長十人合十有四人共領百家而已至於城邑一坊僑舊或有千戶以上唯有里正二人里吏二人里吏不常置隅老四人非是官府私充事力坊事亦得取濟若論外黨便是煩多

齊文宣始立九等之戶富者稅其錢貧者役其力

隋文帝受禪頒新令五家爲保保五爲閭閭四爲族皆有正畿外置里正比閭正黨長比族正以相檢察 蘇威奏置五百家鄉正令理人閒詞訟李德林以爲本廢鄉官判事爲其里閭親識判斷不平今令鄉正專理五百家恐爲害更甚且今時吏部總選人物天下不過數百縣於六七百萬戶內銓簡數百縣令猶不能稱才乃欲於一鄉之內選人能理五百家者必恐難得又卽要荒小縣有不至五百家者復不可令兩縣共管一鄉敕內外羣官就東宮會議自皇太子以下多從德林議蘇威又言廢郡德林語之云修令時公何不論廢郡爲便令出其可改乎然高頴同威之議遂置之十年虞慶則於關東諸道巡省使還奏云五百家鄉正專理詞訟不便於人黨與憎憎公行貨賄乃廢之

唐令諸戶以百戶爲里五里爲鄉四家爲鄰三家爲保每里設正一人若山谷阻險地遠人稀之處聽隨便量置掌按比戶口課植農桑檢察非違催驅賦役在邑居者爲坊別置正一人掌坊門管鑰督察姦非並免其課役在田野者爲村別置村

正一人其村滿百家增置一人掌同坊正其村居如滿十家者隸入大村不須別置村正天下戶量其資產升降定爲九等三年一造戶籍凡三本一留縣一送州一送戶部常留三比在州縣五比送省

儀鳳二年二月勅自今以後省黃籍及州縣籍

也諸里正縣司選勳官六品以下白丁清平強幹者充其次爲坊正若當里無人聽於比鄰里簡用其村正取白丁充無人處里正等並通取十八以上中男殘疾免充

開元十八年勅天下戶等第未平升降須實比來富商大賈多與官吏往還遞相憑囑求居下等自後如有囑請委御史彈奏

廣德二年勅天下戶口委刺史縣令據見在實戶量貧富等第科差不得依舊籍帳睿宗景雲二年監察御史韓琬陳時政上疏曰往年兩京及天下州縣學生佐史里正坊正每一員闕先擬者輒十人頃年差人以充猶致亡逸卽知政令風化漸以敝也

宣宗大中九年詔以州縣差役不均自今每縣據人貧富及役輕重作差科簿送刺史檢署訖鍊於令廳每有役事委令據簿輪差

周顯德五年詔諸道府令團併鄉村大率以百戶爲一團每團選三大戶爲耆長凡民家之有姦盜者三大戶察之民田之有耗登者三大戶均之仍每及三載卽一如是

宋太祖皇帝建隆三年舊制凡有課役皆出於戶民郡國輦運官物率以僑居人充至是始令文武官內諸司臺省監諸使不得占州縣課役戶及諸州不得役道路居民爲遞夫五月詔令佐檢察差役有不平者許民自相糾舉京百官補吏須不礙役乃聽國初循舊制衙前以主官物里正戶長鄉書手以課督賦稅耆長弓手壯丁以

逐捕盜賊承待人力手力散從官以奔走驅使在縣曹司至押錄在州曹司至孔目官下至雜職虞侯揀摺等人各以鄉戶等第差充

乾德五年又禁諸州職官私占役戶供課

太宗太平興國三年京西轉運使程能上言諸州戶供官役素無等第望品定爲九等著於籍以上四等量輕重給役餘五等免之後有貧富隨所升降望令本路施行俟稍便宜即頒於天下詔令轉運使躬裁定之

七年令兩京諸州府部民有乏種及耕具人丁者許衆共推擇一人練土地之宜明種樹之法者縣補爲農師令相視田畝沃瘠及五種所宜指言某處土地宜植某物某家有種某戶有丁男某人有耕牛即令鄉三老里胥與農師周勸民分於曠土種蒔俟歲熟共取其利爲農師者蠲稅外免其他役民家有嗜酒賭博者怠於農務者農師謹察之白於州縣論其罪以警游惰焉九年以其煩擾停之

淳化五年令天下諸縣以第一等戶爲里正第二等戶爲戶長勿得冒名以給役詔今循其制

宋朝凡衆役多以廂軍給之罕調丁男大中祥符五年提點府界段惟幾發中牟縣夫修馬監倉羣牧制置使以廩卒代焉因下詔禁之

天禧元年又詔治河勿調丁夫以役充

乾興元年十二月

時仁宗已即位未改元

臣僚上言伏見勸課農桑曲盡條目然鄉閭之弊無由得知朝廷惠澤雖優豪勢

侵陵罔暇遂使單貧小戶力役靡供乃歲豐登稍能自給或時水旱流徙無蹤戶籍雖有增添農民日以減少以巨愚見且以三千戶之邑五等分等中等已上可任差遣者約千戶官員形勢衙前將吏不啻一二百戶並免差

通一縣鄉村諸色役人又不啻一二百戶如此則二三年內已總徧差纔得歸農官復應役直至破盡家業方得
休閑所以人戶憚見稍有田產典賣與形勢之家以避徭役因爲浮浪或縱情游更有諸般惡倖影占門戶田土
稍多同口骨肉及衙前將吏各免戶役者除見莊業外不得更典賣田土如違許人告官將所典賣沒官自減農
田之弊均差遣之勞免致私役不禁因循失業其罷俸罷任前資官元氣田者許置五頃爲限詔三司定奪三司
言准農田勅應鄉村有莊田物力者多苟免差徭虛報逃移與形勢戶同情敢倖却於名下作客戶隱庇差徭全
種自己田產今與一月自首放罪限滿不首許人告論依法斷遣支賞又准勅應以田產虛立契典賣於形勢豪
強戶下隱庇差役者與限百日經官首罪改正戶名限滿不首被人告發者命官使臣除名公人百姓決配今准
臣等欲請命官所管莊田定以三十頃爲限衙前將吏合免戶役者定以十五頃爲限所典買田只得於一州
之內典買如祖父遷葬別無墾地者數外許更置墳地五頃若地有崖嶺不通步量刀耕火種之處所定頃畝委
逐路轉運使別爲條制詣實中奏又按農田勅買置及析居歸業佃逃戶未併入本戶者各共戶帖供輸今並須
割入一戶下今後如有違犯者科罪告人給賞並從之 開寶平蜀後令西川得替官部綱赴京與減一選無選
可減加一階 止齋陳氏曰熙寧罷衙前應綱運皆募得替官管押自令下無應募者

仁宗景祐中詔川陝閩廣吳越諸路衙前仍舊制餘路募有版籍者爲衙前滿三期罪不至徒補三司軍將
皇祐中又禁役鄉戶爲長名衙前使募人爲之 役之重者自里正鄉戶爲衙前主典府庫或輦運官物往往破
產景祐中稍欲寬里正衙前之法乃命募充 知并州韓琦上疏曰州縣生民之苦無重於里正衙前兵興以來
殘剝尤甚至有孀母改嫁親族分居或棄田與人以免上等或非分求死以就單丁規圖百端苟脫溝壑之患每

鄉被差疎密與費力高下不均假有一縣甲乙二鄉甲鄉第一等戶十五戶計費爲錢三百萬乙鄉第一等戶五戶計費爲錢五十萬番休遞役卽甲鄉十五年一周乙鄉五年一周富者休息有餘貧者敗亡相繼豈朝廷爲民父母之意乎請罷里正衙前命轉運司以州軍見役人數爲額令佐視五等簿選一縣計之籍皆在第一等選費最高者一戶爲鄉戶衙前後差人倣此卽甲縣戶少而役蕃聽差乙縣戶多而役簡者簿書未盡實聽換取他戶里正主督租賦請以戶長代之二年一易下其議京畿河北河東陝西京東西轉運司度利害皆以爲便而知制誥韓絳蔡襄亦極論江南福建里正衙前之弊絳請行鄉戶五則之法襄請以產錢多少定役重輕至和中遂命絳襄與三司參定繼遣尙書都官員外郎吳機復趨江東殿中丞蔡橐趨江西與長吏轉運使議可否因請行五則法凡差鄉戶衙前視費產多寡置籍分爲五則又第其役輕重放此假有第一等重役十當役十人列第一等戶百第二等重役五當役五人列第二等戶五十以備一番役使藏其籍通判治所遇差人長吏以下同按視之轉運使提點刑獄察其違慢遂更著淮南江南兩浙荆湖福建之法下三司頒焉自是遂罷里正衙前百姓稍休息矣按乾興元年臣僚上言影占徭役之害自官豪勢要以至衙前將吏皆避役之人請立限田之法命官三十頃而衙前將吏亦得占十五頃餘者以違制論夫均一衙前也將吏爲之則可以占田給復鄉戶爲之則至於賣產破家然則非衙前之能爲人禍也蓋官吏侵漁之毒可施之於愚戇之鄉氓而不可施之於諳練之將吏故也韓蔡諸公所言固爲切當然過欲驗鄉之闊狹役之疎密而均之且旣曰罷里正衙前而復選費最高者爲鄉戶衙前則不過能免里正重復應役之苦而衙前之弊如故也此王荆公雇募之法所以不容不行之熙豐歟慶厯中令京東西河北陝西河東裁損役人給使不足益以廂兵時范仲淹執政以爲天下縣多故役蕃而